

Certificazion dal furlan: presentâts i gnûfs struments didatics

I materiâi a son stâts predisponûts de Universitât furlane
in colaborazion cu la Regjon e cu la ARLeF

UDIN – La Agjenzie Regjonâl pe Lenghe Furlane e la Universitât dal Friûl, in presince de Assessore ae Istruzion, ricercje e universitât de Regjon, **Alessia Rosolen**, a àn presentât in forme uficiâl i gnûfs struments didatics che a permetaran di inviâ la certificazion de lenghe furlane. Al è un dai prins pas previodûts dal acuardi firmât dai doi ents li che dutis dôs lis parts si son impegnadis a colaborâ inte organizazion di cors di formazion e inte realizazion e publicazion di tescj e struments didatics par imparâ la lenghe furlane, cul obietîf di preparâ cui che al vueli otignî la certificazion linguistiche pal furlan, in atuazion de leç regjonâl 29 dal 2007.

I trê volums – curâts de professore **Fabiana Fusco** e risultât dal lavôr plurienâl fat dal Ateneu furlan cu la poie dal Assessorât regjonâl ae Istruzion – a permetaran di valutâ i nivei progressîfs di competence (A, B e C), su la fonde di ce che al è previodût dal Cuadri comun european su lis lenghis.

La seconde fase dal projet – che si inviarà in curt – e previôt la formazion dai prins certificadôrs che a varan di valutâ lis competencis linguistiche di cui che al domandarà di jessi certificât pes capacitâts di scolte, leture, conversazion, scritture e interazion par furlan. La ARLeF e vûl partî cui prins esams di certificazion fra la fin di chest an e il tacâ dal prossim.

Cemût che e à ricuardât la assessore, la Regjon e crôt intal plurilinguism, che le fâs uniche in Italie, stant che al rapresente un valôr determinant de sô autonomie e de sô specialitât. Pe lenghe furlane, la Regjon e à pontât suntune programazion plurienâl, fissant in maniere clare lis tapis di un percors che al puartarà ae formazion e ae certificazion di docents e arlêfs. Intal ringraciâ l'Ateneu, la ARLeF e il Cirl, la assessore e à ricuardât ancje cemût che la certificazion e sedi un passaç fundamentâl par alçâ il status dal furlan, come che al sucêt par dutis lis lenghis sometudis a passaçs di verifiche, di formazion continue e di acès a percors colegâts, in ultime analisi, ae lôr certificazion finâl.

Il **president de ARLeF, Eros Cisilino**, in ocasion de presentazion uficiâl dai trê volums, al à definît l'inviament dal sisteme di certificazion tant che une svolte storiche. Al à rimarcât cemût che - par che une lenghe si slargji e par che e davuelzi in maniere zovevule il so rûl - si vedi ancje di aciertâsi che e vegni doprade, massime intal scrit, in maniere corete, de bande di insegnants, operadôrs linguistics, funzionaris publics o altris sogjets clamâts par leç a cognossi la lenghe. Alore – cemût che al à volût precisâ ancjemò Cisilino – si trate di un passaç fundamentâl, finalizât a alçâ il status dal furlan e che al permet il plen disvilup tant che codiç di comunicazion just par ogni ambit, e duncje ben inserît inte societât contemporanie, dulà che la comunicazion e à un rûl une vore impuartant. Il sisteme, par

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / e-mail: arlef@caltpr.it

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<<<<<<

altri, al permetarà a ogni citadin di certificâ la proprie cognossince de lenghe, ançe in graciis de frecuece di cors di preparazion specifics.

«I gnûfs struments didatics pe certificazion de lenghe furlane, risultât dal impegn continui de Universitât dal Friûl, e disvilupâts in graciis de poie de Regjon e de colaborazion de ARLeF – al dîs il **retôr Roberto Pinton** – a costituissin un risultât di grande impuartance pe difese dal patrimoni linguistic e culturâl dal Friûl.»

«La certificazion di competence pe lenghe furlane - al à rimarcât il professôr **Enrico Peterlunger**, delegât dal Retôr pe promoziun de lenghe e de culture furlane de Universitât dal Friûl e diretôr dal Cirl - al è un strument fundamentâl par consolidâ i aspiets formatîfs, ma ançe aministratîfs, de lenghe furlane, e par favorînt un ûs simpri plui cussient e competent. La Universitât dal Friûl e à puartât indevant cun rigôr sientific, precision e completece la elaborazion di criteris e materiâi che a coventin par cheste finalitât, in particolâr graciis ae competence de professore Fabiana Fusco e al so grup di lavôr. Pardabon, chest al è un altri pas fundamentâl par realizâ il compit che la leç istitutive di cheste Universitât nus à dât, o ben chel di operâ par contribuî al progrès culturâl, sociâl e economic dal nestri Friûl.»

Udin, ai 20 di Avrîl dal 2022

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / **e-mail: arlef@caltpr.it**

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<<<